

Gerbrandi Bakker Oratio de iis, quae artis obstetriciae utilitatem augere possunt et gratam magis acceptamque reddere.

Contributors

Bakker, G. (Gerbrand), 1771-1828.
Royal College of Physicians of London

Publication/Creation

Groningae : Apud Theodorum Spoormaker, 1811.

Persistent URL

<https://wellcomecollection.org/works/g8dxmc8e>

Provider

Royal College of Physicians

License and attribution

This material has been provided by This material has been provided by Royal College of Physicians, London. The original may be consulted at Royal College of Physicians, London. This material has been provided by Royal College of Physicians, London. The original may be consulted at Royal College of Physicians, London. where the originals may be consulted. This work has been identified as being free of known restrictions under copyright law, including all related and neighbouring rights and is being made available under the Creative Commons, Public Domain Mark.

You can copy, modify, distribute and perform the work, even for commercial purposes, without asking permission.



Wellcome Collection
183 Euston Road
London NW1 2BE UK
T +44 (0)20 7611 8722
E library@wellcomecollection.org
<https://wellcomecollection.org>



(a) D2/59-a-4

67





Digitized by the Internet Archive
in 2016

<https://archive.org/details/b28518500>

GERBRANDI BAKKER ORATIO

DE IIS,

QUAE ARTIS OBSTETRICIAE UTI-
LITATEM AUGERE POSSUNT, ET
GRATAM MAGIS ACCEPTAM-
QUE REDDERE.

PUBLICE DICTA

DIE II. MAII MDCCCXI.


CUM

IN ACADEMIA, QUAE GRONINGAE EST, OR-
DINARIAM ANATOMES, PHYSIOLOGIAE,
CHIRURGIAE ET ARTIS OBSTETRICIAE
PROFESSIONEM AUSPICABATUR.



GRONINGAE,
APUD THEODORUM SPOORMAKER.

IN TYPOGRAPHIA W. ZUIDEMA.



ROYAL COLLEGE OF PHYSICIANS
LIBRARY

CLASS	61
ACCN.	13433
SOURCE	51423
DATE	

G. B A K K E R

O R A T I O

DE IIS,

*QUAE ARTIS OBSTETRICIAE UTI-
LITATEM AUGERE POSSUNT, ET
GRATAM MAGIS ACCEPTAM-
QUE REDDERE.*



ACADEMIAE RECTOR MAGNIFICE!

*QUIBUS RERUM ACADEMICARUM CURA
COMMISSA EST, VIRI PERILLUSTRES!*

A

QUA-

QUARUMCUNQUE DISCIPLINARUM PROFESSORES CLARISSIMI!

QUI REM SIVE PUBLICAM SIVE SACRAM MODERAMINI, VIRI ORNATISSIMI, PLURIMUM REVERENDI!


QUARUMVIS ARTIUM DOCTORES ERUDITISSIMI!

QUOTQUOT PRAETEREA ADESTIS, CUIUSCUNQUE ORDINIS AC DIGNITATIS, AUDITORES EXOPTATISSIMI!

VOS DENIQUE, QUI HAC IN ACADEMIA AD VITAE BEATAE ET FRUCTUOSAE PRAESIDIA COMPARANDA ANIMUM ADPELLITIS, IUVENES PRAESTANTISSIMI!

O R A.

O R A T I O.



Quicumque in rerum naturalium scrutationem intentus vires observaverit, quibus corpus animale instruxit sapientissimus rerum Creator, stupendam certe mirabitur organorum fabricam, quorumvis animantium vitae generi necessariam, et ad sui ipsius conservationem imprimis accommodatam. Namque suo quodque modo nutriuntur quotquot sunt animalia; quae imminent pericula, sensuum artificio percipiunt, armis avertunt, velocitate effugiunt artuve prorsus eludunt: quin et dantur, quorum vita per longum temporis spatium sopita quasi denuo resuscitatur, et alia, quae viribus insitis integra membra truncata restituunt. Tanta sa-

prientia et benignitate sunt composita Naturae opera, ut quae perfectioribus animantium classibus longior aetas et magis complicata corporis machina adfert vitae comoda, his non minora certe, aequa satis lege, abiectioribus concesserit.

Quae licet ita sint, fragile admodum nihilominus deprehendimus esse corpus animale. Neque solius fragilitatis verum et sexcenta alia pericula vitae insidiari, funeraque immatura numerum eorum, quae senectutis fato succumbunt, longe superare, nemo est quin animadverterit. Constans itaque existimanda est haec lex Naturae, ut ipsa perdat quae produxit; ut leto tradat quae optimis vitae praesidiis munivit; ut cives inmollet singulorumque jacturam faciat, ne respublica turbetur. Hanc tuetur semper, cavendo ne pereat species: atque hoc titulo inprimis nomen conservatricis illi tribuendum est: maximum enim praecipuae huic curae momentum adjecisse illam vel inde patet, quod vix ullum, ne ex inermium quidem et timidissimorum animalium generibus, penitus delere potuerit rapax hominum saevitia.

Ne-

Neque et humanum genus, quamvis vitae tenuissimae ac mille plagis perculsum et labefactatum, damna sua refarcire cesfat: quid? quod a singula generatione auctior fere posteritas evadit.

Auxilia, quibus hunc scopum primarium Natura semper attingit, consideranti patet, non iisdem conservari humanum et brutorum genus. Scilicet haec ad eandem semper normam ducuntur; his, a rerum initio ad hunc usque diem, iidem morbi, eadem sunt remedia; fortioribus aequalis est voracitatis gradus, debilioribus praedarum numerus; aliis stirpem conservat partus a vita longaeva saepius repetitus; aliis fertilitas maxima; alia denique, plantarum instar, procreantur e furculis, aut sexu androgyno aut generatione ambigua: quin et animalibus domesticis, quae, aberratione a statu naturali, observationum copiam nobis praebent, rarius est partus difficilis, vix unquam uterus sterilis vel abortivus.

In humana quoque specie propaganda latius patere videtur Naturae cura, quam in conservatione corporis individui. Novum saepe graviditas delicatissimae feminae

viribus addit robur ignotumque vigorem: ossium fractorum coalitus, ne nutritionis detrimentum foetus capiat, ad partus terminum differtur; sopitur visceris vitalis dira labes: quae, ut ignis suppositus cineri doloso, vixdum edita progenie, in vivas flammās exarsurus, brevi consumet officio materno sacratam victimam. Imo et in enitendo partu mirandae saepe sunt Naturae vires, quibus amoveantur exeunti foetui opposita tot et tanta obstacula, ut vinci posse vix credat, nisi qui intentissima parturientium molimina viderit expertus.

Undenam vero ista humani generis infelicitas, ut nostris in terris natorum vigesimus lucem haud adspiciat; ut medius eorum numerus aetatem virilem vix attingat; ut non rarus sit partus molestus et frequentior etiam abortio? Num forte a statura erecta aut corporis teneritudine derivari potest hoc nostrae speciei proprium malum? Haud quaquam A. A.! Namque et parturiendi difficultas non nisi paucas matres premit; et populi incultiores, huius functionis facilitate, animalibus vix sunt inferiores.

Hu-

Humana autem ratio et ingenium artibus excultum corpus hebetat. Luxuries et ambitio, paupertas et auri corradendi ardor, otium et labor immoderatus tam animi quam corporis iliadem malorum concitant, quae, aut sensim increcendo aut rapidi torrentis instar, cultiorem generis humani partem penitus delerent, nisi eodem ingenio, eadem cultura derivaretur, et, quae iam fecerunt mala, idoneo obice averterentur. Sic annonae difficultati, ex nimia victus consumptione ortae, opposuit agriculturam perfectiorem et mercaturam; crudelissimis bellis salutifera luis vaccinae vulnuscula; morbis medicinam, infaustaeque Lucinae artem obstetriciam.

Dubitatisne A. A.! An haec ars tanti sit, ut inter ingenii fructus uberiores et humanae salutis praesidia referri mereatur? Haud injustum prorsus dici potest illud dubium: etenim ars obstetricia, per longa saecula, detrimenti plus an emolimenti humano generi attulerit, statuere vix ausim. Quum vero nulla fingi possit disciplina, quin ortum suum et incrementum debeat temporis, ingenii et studiorum opportunitati, non

non potuit quin, longo demum tempore post renatas literas, ad hodiernae perfectionis culmen perduceretur obstetricia; quippe cujus doctrina suis premitur difficultatibus, non nisi temporis et loci beneficio sensim amovendis.

Ea profecto est huius aevi felicitas, ut ubique splendeat nostrae disciplinae lumen; ut gaudeamus scholarum exquisitarum numero, et medicorum ad artem rite addiscendam se adcingentum copia: inter quae huius aetatis commoda laeto atque grato animo recordamur Reipublicae Rectorum paternam in nostros Cives pietatem, sancitis de universa arte medica legibus conspicuam.

Neutiquam itaque incultus jacet fecundus ager; non autem tam generosae frugis segetes ferre hucusque solet, quales a naturali fertilitate expectares, vel cultorum labori et aerumnis respondere diceres. Verum aliud est duros exantlare labores, aliud humi naturam noscere, deducto a fonte rivulo, irrigare sicca, omnemque industriam in re ponere. Et profecto, si quae alia, ars obstetricia digna est, ubi nervos intendant
quot-

quotquot eam factitare instituerint; sive illius ambitum spectes, seu momentum seu denique ejus exercendae difficultatem et molestiam.

Quae cum ita sint, non abs re fore arbitrabimini, A. A. ! si, hoc solenni die, Anatomes, Physiologiae, Chirurgiae et Artis obstetriciae docendae provinciam auspicaturus, viam monstravero et adparatum, ad hanc artem rite discendam atque colendam apprime necessarium, et dixero *de iis, quae artis obstetriciae utilitatem augere possunt, illamque gratam magis acceptamque reddere.*

Accipite dicentem, qua estis, benevolentia; nec displiceat, etiamsi solitam huic Auditorio facundiam non habitura sit, oratio.

Ut disciplinae obstetriciae, quo hodie colitur ambitu, dignitas, et scientiae copia, quae praxin feliciter exercitaturus cum maxime est acquirenda, melius innotescant, errorumque fontes praecipui detegantur, nostri aevi prae superioribus saeculis praestantiam paucis illustrare opportunum videtur. Videtis, facile A. A. ! Artis titulum vix merere rudem istam

atque vagam empiricem veterum medicorum: quippe quibus compagis osseae in corpore humano ac partium mollium, praesertim matricis, fabricam anatomicè indagare denegaverat temporis morumque ratio: quibus quidem minus cognitis, mechanismum partus ejusque causas haudquaquam explicari posse et ultro patet, et medicorum Graecorum atque Arabum scriptis abunde confirmatur. Remedia hinc, in partu difficili ab obstetricibus adhibita, vel vana fuere ac futilia: cujusmodi sunt suffitus, frictiones, amuleta; vel nocentia, uti concussiones vehementes, sternutatio ore clauso et compressis naribus ceteraque anili traditione recepta. Hisce vero ut plurimum fallentibus, si periculum in mora esse censeretur, ad medici auxilium erat confugiendum.

Hic manu non armata vix ullam opem ferre valebat: infantis enim iniqua positio quo minus in meliorem mutaretur, impedivit infelix error, in quo versabantur complures atque gravissimi illius temporis medici: docentes omnem situm, a solita Naturae norma deflectentem, ad illam, quantum fieri posset, reduc-

cen.

cendum esse. Quem tractandi modum, inutilem saepe neque laboris non plenum, deficiente sana theoria, rarissime faustum habere eventum potuisse, non est quod dicam.

Partus vero agrippini, id est pedibus praeviis, ferre pro infelicissimis habiti fuere: non tantum propter ipsius puerperii difficultatem, verum etiam, quod inde nascentibus, imo et humanae societati mala quaedam portendi nonnulli opinabantur: sic enim PLINIUS: „In pedes procedere nascentem contra naturam est; quo argumento eos appellavere agrippas, ut aegre partos: qualiter M. Agrippam ferunt genitum, unico probe felicitatis exemplo in omnibus ad hunc modum genitis. Quamquam is quoque, adversa pedum valetudine, misera juvena, exercito aevo inter arma mortesque, ad noxia succesu, infelici terris stirpe omni, sed per utrasque Agrippinas maxime, quae Cajum et Domitium Neronem Principes genuere, totidem faces generis humani; praeterea brevitate aevi, quinquaginta uno raptus anno, in tormentis adulteriorum conjugis, focerique praegravi servitio, luisse augurium praepos-

teri natalis existimatur. Neronem quoque, paulo ante Principem et toto Principatu suo hostem generis humani, pedibus genitum parens ejus scribit Agrippina."

Alius errorum fons oriebatur ex angustis, quibus circumscripta erat finibus, physiologia: quae proximam et primariam felicitis puerperii causam ponebat in ipsius infantis vita. Hinc ex insolito positu vel proportionem mala aliisque partus impedimentis, ad infantis mortem, ut ab effectu ad causam, argumentatione progressi, nondum natum laedentibus instrumentis aggredi haud dubitabant. Neque alia nisi mortifera instrumenta eo tempore praebuit artis armamentarium; quae adeo in omni difficilis partus genere applicare coacti fuere, „ne, ut ait **TERTULLIANUS**, foetus matricida moriturus esfet."

Pulsa mediæ aevi caligine, literarum lux nostrae quoque disciplinae adfulsit. Conditae, imprimis in Gallia et Germania, quibus medicina summopere amplificata est, complures Academiae, variaeque de mechanismo partus ejusque impediti causis et remediis, me-

medicorum sententiae, investigationes et pericula artem obstetriciam adeo emendarunt et auxerunt, ut, quocunque modo positus sit foetus, Naturae viribus neutiquam solvendus, sola manu, plerumque vivus in lucem produci potuerit.

Potuerit, inquam: Etenim tantum abfuit, ut propagatos artis limites aequaverit artificum peritia, ut XVII adhucdum saeculo, divulgatis licet PAREI imo et MAURICAEI scriptis, obstetricantium manibus vix tuto committeretur infantis vita. Maior pars obstetricum, Terentianae Lesbiae haud dissimiles, animis incultis fordidaque superstitione inquinatis, artem exercere solebant, inde a PLINII aevo ferme non mutata. Chirurgus ad puerperii lectulum raro patebat aditus, nisi rebus desperatis. Nec mirum: mulieribus enim miseris terrorem incutiebant vulnera, non sine matrum periculo, infantibus infligenda; qua causa quoque factum est ut ἐμβρυουλκίᾳ, cui rite discendae etiam opportunitas deërat, parergi in modum fungerentur Chirurgi. Medicinae autem Doctores, ut ab Hippocratico more et praeceptis non uno modo de-

flectebant, sic artem quoque, quae manu medetur, cane pejus vitabant et angue.

Multis hinc obprobrio fuit disciplina obstetricia, et cultores suos dedecore quodam adficere solebat. Cujus ignominiae depellendae laus tribuenda est LUDOVICO XIV, Galliae Regi; utpote qui chirurgum quemdam Parisiensem nobilitate donavit, addito Obstetricantis vel Obstetricii viri, ad id tempus minus usitato, titulo.

Ejusmodi honores, cum non paucos traherent, ipsam quoque artem haud parum augebant. Praecipuum vero incrementum praebuit exemplum et usus, quae vagas vulgi opiniones quandoque in communem salutem posunt convertere. Quod quidem de Gallia imprimis constat: ab eo enim inde tempore, Regiae sedis incolae chirurgorum obstetricantium auxilium quaesiverunt; quod capitis exemplum secutae sunt ceterae regni partes, imitavere principes Europae gentes.

Ad summum denique fastigium doctrinam evexit instrumentorum perfectio. Ne tamen expectetis, A. A. ! quibus ceterae artes tantum debent, exquisitissimorum

et

et mira arte fabricatorum instrumentorum opes, adtendatis velim artem obstetriciam maxima moliri parvis, simplicissimumque adparatum gravissimis periculis opponere. Qua vero veterum praestantissimo mechanico ingenio nostra aetas palmam praeripit, est cognitio illa mechanismi corporis vivi, est cognitio viae, qua partum dirigit Natura, anatomica corporis feminei et foetus indagatione, ut et accurata observatione et justa experientia atque usu comparata. Pelvis osseae compositio; axis ejus, et angulus, quo perpendicularem corporis lineam secat; dimensio cavi, quod in pelvi est, variis variae capacitatis diametris distincti; infantilis praeterea capitis forma et diametralis mensura, tam proportionem quam positu, pelvis diametris apprime conveniens; ipsius denique capitis, cavum osseum intrantis, progredientis et exeuntis motus ac directio; haec omnia normam constituunt, instrumentorum figurae et compositioni determinandae unice aptam.

Huic autem normae idoneas virtutes conjunctas reperimus in forcipe obstetricia hodierna; qua, utroque ejus brachio, separatim capitis lateribus applicato rursum-

sumque inter se juncto, partus absolvitur, sine ulla
sive infantis sive matris laesione, et nonnunquam ip-
sius Naturae actione tutius ac facilius.

Forcipem, instrumentum in re domestica et chirur-
gia usitatissimum, ad artem obstetriciam transtulisse le-
guntur quoque veteres: quae autem, cum brachia in-
disolubili nexu juncta haberet, infantis vitae parum
potuit prodesse. Saeculo demum XVI ad finem per-
ducto, Anglica CHAMBERLENORUM familia in usu
habere coepit instrumentum, partui, foetu vivo, absol-
vendo aptum: quod inventum, nunquam antea divulga-
tum, unus e CHAMBERLENIS cum ROGERIO RHOON-
HUIZEN, medico ac chirurgo Amstelaedamensi ejus-
que fociis celeb. RUISCHIO et CORNELIO BOEKEL-
MAN communicavit. Ex forcipum genere fuerit illud
instrumentum, an vectis, ad capitis formam incurva-
tus, non satis patet. Certum tamen est, arcani RHOON-
HUISIANI participes non nisi ejusmodi figurae vec-
tem, cujus parandi unum forte ex forcipis brachiis
primam cogitationem injecit, produxisse. Quo sim-
plicissimo instrumento, forcipe licet, qua hodie uti-
mur,

mur, inferiore multos certo leto perituros eripuerunt viri *μυσαγωγῆται*, et qui aetate praecesferant, arte longe superavere.

Adeo longinqui sunt, A. A. ! et absconditi novorum inventorum fontes et origines ; tantaeque molis est impedimenta bono publico objecta amovere, ut utilissimae artis fines proferre ne Graecorum quidem cultissimo ingenio fuerit licitum.

Ex hac vero, quam retulimus, succincta historia clarissime quoque apparet, quam arctissimo vinculo jungantur artes ; non tantum inter se, verum etiam cum gentium Religione et moribus : quorum causâ ab humano corporis dissectione, tanquam a sacrilegio, antiquitus arcebantur medici. Neque Christianae Religionis tenella aetas, tot tantisque agitata calamitatibus, nec illius adolescentia, stupore et vitiis oppressa, divina humanitatis praecepta ad colendas doctrinas et artes in rem suam convertere didicerat.

Sed dolenda magis et maxime improbanda fuit vel fordida avaritia, vel vana ambitio eorum, quibus, dum ipsi oborta luce gaudebant, ceteros homines umbrae

et tenebris relinquendo mirifice sibi placebant. Etenim quis crediderit, nisi fide historica certior factus, nostram Patriam et universam fere Europam, integros LX annos, destitutam fuisse remedio, quo pauci arcani confortes opem ferebant suis! Donec tandem Amstelodamenses medici JACOBUS DE VISSCHER et HUGO VAN DE POLL, pacto pretio, instrumentum illoque utendi rationem sibi pararunt et publici juris fecere. Praestantissimum fane et omni laude dignum eximiorum virorum facinus; quod vero cum non ante obitum chirurgi JOHANNIS DE BRUIN perfici potuerit, accidit, ut arcanum Rhoonhuisianum in lucem prodierit post duos annos, quam egregius LEVRETUS forcipem suam, nova, axi pelvis congruente, curvatura auctam, denuo edendo, artem obstetriciam summopere ditaverat, et humanae saluti optime consuluerat.

Ad quemnam perfectionis gradum, hac sola curvatura, suum instrumentum perduxerit vir summus, vel ex eo elucescit, quod, ex magno satis forcipum, quas postea unusquisque fere rei obstetriciae auctor in-

venire studuit, ab anno praecedentis saeculi LI ad hunc usque diem, ne una quidem prodierit Levretianâ vere superior. Quod quidem ita intelligi nolo, quasi nullam prorsus utilitatem adtulerit major utriusque curvaturae angulus, aut juncturae, manubrii aliorumve partium mutata forma; verum ita, ut in manu prudentis illiusque formae adfueti operatoris, partui celeriter, tuto ac jucunde absolvendo omnino parem esse laudatam forcipem, neque cedere aliis, contendam.

Methodus applicandi instrumenta, vertendi foetum in utero, atque imprimis doctrina signorum, quae indicant, utrum partus Naturae relinquendus an arte, et quonam auxilii genere, illi succurrendum sit, summam faciunt disciplinae obstetriciae; quae, ut firmo talo stare valeat, fulcri instar eget artibus, quae maximo illi sunt auxilio; quarum prima leges physico-mathematicas, altera vires complectitur, quae corporis animalis functionibus praesunt. Quis enim, quaeso, unquam par erit solvendo artis problemati, quo proponitur: *per datam pelvis capacitatem, educere foetum determinatae*

magnitudinis, nisi cui accurate innotuerit et mente reposita praesto sit forma corporis educendi, ac viae per quam educi debeat?

Nimirum anatomicam pelvis, partium contentarum et adjacentium, ut et infantilis corporis notitiam esse fundamentum, quo deficiente, mole sua ruat ipsa artis scientia, extra omnem dubitationis aleam ponit historia. Itaque, qui suam observationum copiam qualemcunque pro constantium Naturae legum cognitioni substitui posse opinatur, vehementer profecto fallitur. O egregium illum artificem! morte et miseriis nempe exstruit experientiam infirmam plerumque, vacillantem saepius, serius ocius in temerarium caput relapsuram. Cognitis vero, quaecunque explicat anatome; perspecta insuper, quam Natura dux infanti exituro monstravit, via; diligenter consideratis capitis et pelvis diametris tam congruentibus quam oppositis; axe, quem caput percurrit; punctis, quae tangit; lineis, quas fecat; circuli quadrante, quo rotatur circa axem suum perpendicularem; arcu, quem circumscribit mentum a pectore remotum; versatione de-

denique, quae, rotatorio motui contraria, post exitum, situm capitis restituit; his inquam diligenter observatis, quid obstat, quo minus partes obstetricias feliciter agamus?

Certe si quis omnia, quae pertinent ad partus naturalis actionem, probe comprehenderit, non potest, quin a vana empiricorum jactantia tam longe absit, quam, multa adhuc in disciplina obstetricia discenda superesse, sibi habet persuasissimum. Verum et in ipsam simplicioris hujus partus mechanismum nemo facile penetraverit, nisi in auxilium vocatis disciplinae mathematicae praeceptis. Nam mechanica principia esse modo vidimus: ex quibus legibus partu explicando, artem quam maxime illustrare viri principes LEVRETUS, SMELLIUS, CAMPERUS, quique iis successerunt auctores; quorum institutiones lectorem requirunt, in doctrina gravitatis, motus et instrumentorum simplicium nequaquam hospitem. Exempli causa ponamus directionem, quam sequitur infans in partu naturali, ejusque causas. Receptaculum scilicet foetus, vividissima, qua praeditum est, incitabilitate se contrahit:

hac contractionē infans, intercedente aqua membranīs inclusā, et, postquam aqua effluerit, ipso utero comprimitur. Hujus motus compositi vires, ab omnibus uteri punctis emissae, contentum foetum deorsum pellunt, ad locum agendi facultate longe inferiorem, ad uteri ostium. Patet hoc ostium in pelvis ossei cavo, ad infantis caput, non vero nisi justa et determinata positione, recipiendum apto. Mento ad pectus inclinato, vertice praevio, occiput, ad alterutrum latus pelvis, in introitu ita positum est, ut pelvis diameter obliqua capitis diametro longitudinali, utraque maximā, respondeat.

Si quando, corpore erecto, rectam lineam transmittas per centrum aperturæ superioris pelvis osseae; in horizontem cadere observabis istam lineam, ad angulum 59° . Linea vero, quae fecat partes centrales pelvis inferioris, priori neutiquam invenitur parallela, angulum quippe faciens horizontalem 13° magnitudine illum superantem. Componitur itaque axis pelvis communis ex duabus lineis, in medio cavo, ad angulum 167° convenientibus: quarum superior, sursum continuata,
axin

axin constituit uteri gravidi, seu lineam directionis, quam sequitur foetus, Naturae viribus propulsus. Linea haec, infantis collum et basin capitis oblique secans, terminatur in occiput; quam ob causam haec pars maxime promovetur, et, in partu normali, praevia semper invenitur.

Nulla tamen vis, quantumvis vehemens, sufficeret ad vincendum pelvis renixum; nisi, ex hoc ipso obstaculo, aliûs generis motum caput pateretur, itidem ad compositos referendum. Tali scilicet ratione constructa est pelvis illa caverna ossea, ut ejus aperturae superioris diameter maxima directionem sequatur oblique transversam; mediæ contra cavi et imi capacitas major sit in linea, quae ducitur ab antica ad posticam corporis partem. Quum autem, ad partum feliciter absolvendum, infantis et pelvis diametri majores sibi mutuo respondeant necesse sit, sequitur, caput, pelvim permeans, motu rotatorio circa suum axem verticalem, quadrantem circuli percurrere debere, evitando quantum licet puncta contactus, quae pelvis praebet, atque obstantibus ossibus cedendo.

Denique (nam taedium vobis afferre sentio didacticum sermonem, ab oratorio non nihil alienum) ad exitum pelvis protrusum caput volvitur circa suum axem transversarium, mentumque a pectore removetur: cujus motus causa iterum quaerenda est in angulo vel curvatura axis, quem pelvis habet. Occiput nempe descendendo primas agit, quamdiu situm est in axe superiore, qui, uti dictum, axem uteri directione aequat. Simul autem atque, axin inferiorem sequens, antrorsum dirigitur, actio lineae directionis uteri determinatur unice in partes capitis anteriores, et, vix educto occipitio, frontem et faciem expellit.

Videtis, A. A.! problema, quo nihil majus, nihil antiquius humano generi excogitari potest, simplicissimo mechanismo solutum: atque mecum admiramini mechanicas leges, quas, in hominis nascentis gratiam, Naturae imposuit Creatoris sapientia, easque vitae corporeae tam penitus commixtas, ut, his illisve deficientibus, turbetur actio, impediatur partus; tantoque insuper honore dignatus fuit ingenium humanum, ut Naturae difficultates elevare, quaeque ipsum corpori fecit vulnera, refarcire jusserit. Si

Si verum est, omne artis auxilium componi debere ad normam, cui partum naturalem adstrictum voluit Natura, facile perspiciatis, A. A.! bene cognita haec Naturae norma quantum valeat ad explicandam et corrigendam axis uterini aberrationem; quantum in emendanda positione infantis iniqua, in construendis et applicandis instrumentis, in universae denique artis administrandae ratione.

Quodsi vires vitae languent vel prorsus deficiunt, arti, functionum naturalium imitatrici, datum est infantem incolumem in lucem proferre. At vero validissima Naturae conamina salutare opus ad finem perducere incasum quandoque tentant, sicubi pelvis coarctatio, infans monstrosa mole auctus, aliaque ejusmodi mechanica obstacula resistant. Hinc sequitur, dixerit aliquis, virium vitalium harmoniae et universae oeconomiae humanae inscitiam obstetricanti in partu expediendo vix obfutura esse. Expediet quidem, qui cetera artis praecepta probe noverit, sed viri eruditi, artisque, quam profitetur, omnino periti titulum jure sibi vindicare haud debere contendendo. Praeterquam enim quod studiorum ardor et impe-

tus, ad artis principia discenda necessarius, in limine subsistere nesciat, omnesque, qui ad propositum ducunt, labores exantlare soleat, dubia semper erit et incerta res obstetricia, si fundamento destituatur, quod omni medicinae praebet doctrina physiologica. Ne dicam de elegantia, quae disciplinae cultorem ab empirico inprimis distinguit, deque literarum suavitate, nemini non jucunda nisi ignoranti: at fingite vobis A. A.! obstetricantem, quem fugiunt sanguinis circuitus et ejus efficacia; nervorum functio illorumque mirabilis sympathia; graviditatis effectus in corpore materno; embryonis foetusque nutritio, diversaque hujus a recens nati vita: quis credat artem observando aucturum esse, vel, in casu inopinato, recte curaturum eum, quem prima origo causae fefellerit? Nam, ut curvi norma rectum, sic morbi cognoscendi praesidium est distincta sanitatis notio. Cum autem corpus femininum, in quocumque generationis stadio, propter vitam vegetiorem, sit pronum in valetudinem foetui inprimis noxiam, cuivis obstetricanti in promptu esse debet abortuum aetiologia, illosque praecavendi, pro diver-

ver-

versis causis, diversa ratio. Instante vel terminato partu, diris convulsionibus, exanimanti lipothymiae aut sanguini pleno rivo fluenti, non uno modo occurret sapiens medicus. Etenim licet experientia multum hic faciat, plurimum fane praestat consilium prudens. Acutissimorum horum affectuum haud raro quidem causa latet, nonnunquam optimis remediis frustra tentatur; faepissime vero medicamina eludet, quibus, neglecta causa, ipsum morbum aggredi sibi proponit empiricus.

Signa characteristic morborum graviditatem mentientium, veluti tumores intestinales, aquosa imi ventris aut ipsius uteri colluvies certo fugient eum, quem latent praecepta theoriae et praxeos medicae; eoque certius, quo magis complicati fuerint hi morbi, vel, et ipsi graviditati supervenerint. Uno verbo: quicumque opato successu, parturientibus opitulari, et bonorum commendationem habere voluerit, physiologiam calere, chirurgiae peritum, neque in medicina hospitem esse illum quam maxime decet.

Artem obstetriciam ornat Medicus; qui, licet illius muneris vinculo non adstrictus, ejus studium haud neglexerit: multae quippe res puerperio obveniunt, quarum penes medicos judicium est. Saepissime obstetricantem consilio adjuvet ingenium medici; at non semper illi praestando par erit, nisi artem experiundo edoctus fuerit; ut in omni casu, quo non, nisi ex perfecte cognita vitiosioris pelvis mensura, constat indicatio, ad quodnam auxilii genus confugiendum sit, ut funestissimi eventus, quantum posunt, arceantur.

Inter mulieres, quibus, ab omni aevo ad hunc usque diem, cura puerperii commissa fuit, existere quis dubitaverit, quae re vera mereant, quem nostrates aliique ipsis tribuunt, sagacitatis titulum? His autem, praeditis facultate comparandi orbem, quem implet doctrina obstetricia, cum finibus, quibus suum officium et usus circumscribitur, rarius imponet incautos seducens symptomatum fallacia: has non retinebit vana gloria, quin, cum opus fuerit, doctiorum auxilium saepius advocent. Verum non desunt, quae, invita

Na-

Natura, artem aggredientes, vel fluctuante animo tempus et occasionem agendi perdant; vel, quod pessimum est, inconsiderate et praecipitanter omnia tentent, Naturae actionem perturbent, culpaque sua et facinore errores prudenter tegere conentur. Harum quidem effraenatam temeritatem severe compescere, illarum vero imbecillitatem consilii, quantum fieri potest, erigere medicorum est. Medico nimirum multa patefiunt, quae latent alios; medicus nihil eorum, quae ad hominum vitam et sanitatem pertinent, a se alienum putat; medicum itaque decet omni opera eniti, ne mala arte opprimatur functio, quae Natura tantis praesidiis armavit: atque in hac re eo felicius versabitur, quo disciplinae obstetriciae copiâ fuerit instructior. Sunt A. A.! qui tum demum praegnantium saluti bene prospectum iri censent, si solis virorum manibus mandata fuerit rerum obstetriciarum cura: quid enim, dicunt, obstetricum ingenio tardius, quid earum doctrina incultius, quid consilio fingi potest levius? At considerate mecum ingentem numerum partuum, qui, hoc facto, obtingerent singulo obstetricanti chi-

rurgo: quippe quorum longe maxima pars confluxura esset ad regiones, opibus et vitae commoditatibus praestantes, relictis nudis et vacuis, quotquot rerum angustiis laborarent, locis. Recordamini mecum praemii, haud ita pridem a vicinae regionis Rectoribus propositi, eum in finem, ut, in illa regione, tam virorum quam mulierum obstetricantium defectus suppleretur. Quod consilium cum, jam feliciore illo tempore, expresferit necessitas, videtis quam parvo contentus esse debeat, qui hisce diebus in arte factitanda tempus consumere constituerit. Horum insuper confluxus ad illas natalis nostri soli partes, in quas commercium maritimum prae aliis divitias olim congesserat, adeo ibi diminuit obstetricum fortunas posteaque numerum, ut metum vix ponere auserim, ne, deficiente aliquando muliebri officio, in dies aucta pauperum frequentia, omni auxilio destitutae miserrimae suae forti penitus relinquantur puerperae.

Rei itaque publicae necessarias, nec arti, quam faciunt, dedecori esse obstetrices, haud negaverim: dummodo caveatur, ne ad Lucinae sacerdotium admittantur

nisi sacris initiatae; nec honore et commodis priventur, quae cuivis homini, omnes sui officii partes rite implenti, debentur. Novi equidem, non multas sane, attamen novi obstetrices, quae felicissimo ingenio tantam doctrinae copiam morumque suavitatem jungebant, ut multi ex majoris tituli viris comparationi cum illis sustinendae vix pares esse viderentur.

Nostra in Patria obstetrices, ab usu instrumentorum, semper amoverunt consuetudo, et leges a quarundam urbium Magistratibus latae: quarum legum causa a vulneribus, forfice et unco inflictis, haud scio an sit repetenda. Sed et haec instrumenta neque conveniunt leniori muliebri ingenio, neque manibus minus exercitatis. Quamquam vero forcipis applicatio periculo minime aequat infantis versionem, quae obstetricibus nunquam denegata fuit, haudquaquam tamen mos vetandi forcipis usum reprobari debet; quum tanti ambitus disciplinae addiscendae et experiundae feminis saepius occasio desit, neque colenti suppetat merces, nec adeo inter se congruant labor honosque. Atque haec inter primas causas referenda est, cur ingenii acie et liberaliore cultu insignes

fe-

feminae non nisi rarissime artem nostram aggrediantur: in qua factitanda sexus sequior, ut ingenii celeritate minime cedit viris, ita patientia, lenitate et indulgentia illos superare, inter omnes utique constat.

Hae virtutes, tam aptae ad mulcendos viriles animos, a nullo obstetricante, rem feliciter gerere cupiente, alienae esse debent; harumque justa et rite temperata conjunctio cum fortitudine et constantia, quae viros decent, virile ingenium ad artem factitandam magis accommodatum reddit. Indulgentissimus itaque sit, quisquis opem ferre velit patienti dolorem et anxietatem, quae feminei corporis et animi temperiem vividiores immoderatus identidem agitant. Perferat omnia, nil nisi praegnantium commoda et salutem respiciens; concedat omnia, exceptis revera nocentibus: si autem de optima partus terminandi ratione consilium ceperit, ab illo se detorqueri non sinat; importuna adstantium proposita breviter refellat, ipsiusque parturientis animum quovis meliori modo quietum reddat; experientia persuasus, gratiam sibi a felici matre habitum iri.

Quo-

Quotidiana observatione constat, praestantissima remedia intempestivo usu noxia fieri; quod et de forcipe obstetricia verum est: hujus enim quo major est utilitas, eo frequentior fit usus, inconsideratior applicatio, pejor fama, gravius malum. Non loquor de imperitis aut temerariis, quibus instrumenta sunt ut gladius in manu infanientis; nec de profano obstetricantium vulgo, qui, majoris lucri, ne dicam praedae causa, „histrionum more, uti verissime CELSUS ait, parvam rem attollunt, quo plus praestitisse videantur;” qui, artem improbe jactitando, terrore exanimant miseras, quarum aegritudinem obtundere optimo cuique jucundissimum est invitamentum laborumque dulce solamen; verum etiam experti et probi hunc in scopulum nonnunquam offendunt; ut adeo si quis, ex dato observationum numero, stupendam partuum armata manu absolutorum copiam consideraverit, ablata forcipe, de genere humano fere actum putet. In hunc errorem abducuntur, qui vel suo tempori nimium parcunt, vel Naturae justo minus credunt, vel denique moram impatienter ferunt. Verum tamen qua de causa fiat, re-

probandum semper erit artificium, quod Naturae operam turbat, raptimque et festinanter praecidit, quae illa lente et facile praeparando moliatur; id quod absque periculo fieri non posse, cuius medicorum notum est ut nihil magis.

Naturae actionem observare, enormes impetus componere, languentem excitare vel arte supplere, objectaque impedimenta amovere officium est obstetricantis. Saepius vero convenit spectatorem agere, et re minus, quam consolando vel consilio juvare: quod autem nemo facile praestiterit, nisi qui hominum mores et ingenium bene cognitum habet, et ea gaudet urbanitate, in qua, auctore QUINCTILIANO, nihil absonum, nihil agreste, nihil inconditum, nihil peregrinum neque sensu, neque verbis, neque ore gestuque possit deprehendi." Hac dote instructum esse decet, quicumque, quas sexus diversitas adfert, difficultates superare et iniquas ex animis evellere velit opiniones. Videmus quidem parturientes obstetricantem ferre morum fati incultorum et minus elegantium: ferunt autem ast invitae; atque si novae sint et ad partum rudes, moles-

lestias, quae soli artifice propriae sunt, arti tribuere, ipsumque in mala necessaria referre solent. Quae ut evitet, ut acutioris ingenii feminis placeat, bonarum in desiderio sit, et multorum saluti inserviat, omnem curam in artis studio et honore, morumque decore et honestamento impendat, oportet.

Princeps autem honestatis atque integritatis fons, ex quo omnes virtutes manare debent, est sensus ille humanitatis; qui, vitae felicitatem augeat an imminuat, inter multos licet ambigatur, a quovis tamen possidentium certe gratissimorum Naturae munerum numero habetur.

Cum vero ad leniora semper inclinent, qui hac animi indole gaudent, hominumque miseriis plurimum affligantur, in ignavum languorem facile proni, inertes lacrymas malorum torrenti opposuisse saepius contenti essent, nisi, in divinis Christianae Ethices praeceptis, robur atque firmamentum inveniret mitior natura. Etenim tam late quidem patet Religionis auctoritas, ut vel duriora pectora ad humanitatis officia quaelibet allicere valeat: sed quam rara, quam difficilis, quam

longae exercitationis est tanta animi confirmatio ! quam multa vitae commoda is resignare debet, qui omnem vitam consumit aegritudines inter et calamitates, si nullum incitamentum admoveret innatum quoddam afflictis succurrendi dulce desiderium. Arduam profecto sibi viam optat molestiisque plenam, quisquis, hoc amore destitutus, quamcunque medicinae partem facititare aggrediatur; cui neque laboriosissimi operis taedia compensare, neque multiplices injurias solari possit laeta hominum vitae arte servatae conscientia.

Hac conscientia fretus, humanitatis stimulo impulsus, Religione confirmatus, nil respicit obstetricans nisi parturientium et infantum salutem, nihilque negligit eorum, quae illis inservire ullo modo possint. Publicam de rebus obstetriciis opinionem, quippe potentem hominum rerumque dominatricem, ea, qua par est, observantia colit, illamque in civium emolumentum et in artis honorem prudenter moderari studet. Famae suae consulit, qua perdita, tollitur publico commodo inserviendi occasio. Semper enim memorem esse convenit praecepti Celsiani: „ubi gravis metus est sine
cer-

certa tamen desperatione, prudentis est indicare necessariis, periclitantis in difficili rem esse, ne, si victa ars malo fuerit, vel ignorasse vel fefellisse videatur.” Neutiquam vero tanti intersit inservire famae, ut ab auxilio ferendo sese subtrahat unquam: „prudentis enim, quamquam est, teste eodem CELSO, eum, qui fervari non potest, non attingere, ne videatur occidisce, quem fors ipsius interemit;” procul tamen, quisquis religiose officio fungi cupiat, ab ista, quae est hujus saeculi hominum, prudentia absit, semperque persuasum habeat, vitam obscurissimi hominis servatam vel certe productam omni laudi anteponendam, nullumque theatrum, uti verissime monet CICERO, virtutis conscientiam majus esse.

Nihil vero in arte praestantius, aut muneris dignitati convenientius excogitari potest, quam opem ferre tenuioris loci atque conditionis hominibus; quibus, tantum non omnibus vitae commoditatibus destitutis, vita et sanitas sola sunt vivendi pretia. Obstetricantis quidem non esse potest, ut ita dicam, habitare pauperum tabernulas, aut inservire universis, qui eum

modo voluerint; verum maxime est ejus neminem prorsus recusare eorum, qui ipsius auxilio indigent, eorumque sollicitudines omni humanitate et indulgentia adlevare.

Quo autem pacto ad rem suam familiarem animum adpellere poterit, qui, ad pauperum salutem adtentus, mercedem non respicit, qui totus est in curandis alienis? Aut fallor, A. A.! aut decet medicum (clinicus sit an chirurgus vel obstetricius, eodem redit) gratuito et absque ullo praemio, operam praestare egenis, quibus publica cura haud prospexerit, omnibus. Ab aliis mercedem accipiat, non petat, ac neminem prorsus ad solutionem urgeat. Si quis est, qui honoris pro vitae sanitatisque redditae beneficio debiti, gratiasque illi habendas memoria amittere gaudet; habeat sibi: medicus sui officii partes implevit curando corpus, animi aegroti vitia non hujus est tollere. Parvo saepe vivere contentus sit, cui nullum, nisi ex arte, superest victus praesidium: alia enim longe via comparantur opes: neque mollitie et luxuria vires diffluere sinat, quarum integritatem requirit laboriosissimum vitae genus. Scilicet, inter omnes artes, vix ulla molestiis obstetriciam

am superat: five corporis fatigationem spectes, five affectus animi, quem saepius agitant hominum miseriae, nonnumquam conturbat horum injuria, suspensumque semper tenet summum vitae humanae momentum.

Haec omnia si quis secum reputaverit, infortunii plenum esse obstetricantis officium, et tantis sollicitudinibus suscipiendis et perferendis animum vix sufficere autumabit. Quotidiana vero experientia constat, nullam rem boni publici copia abundare, quin et illius utilitatis aliquam partem in administratorem redundare observemus. Sic et ex obstetricia praxi, quisquis ad illam rite colendam necessaria comparaverit, fructus capiet minime contemnendos. Laboris quidem praemium raro licet aequale sit utilitati, quam adfert, aut difficultatibus, quibus premitur, qui hanc artem facit; vix unquam tamen rerum necessariarum penuriam patietur, si paucis contentus vivere didicit, nec fortunam praeripere festinatione gestit.

Non plana equidem semper via incedere sibi proponat: in lubrico versatur obstetricantis inprimis fama. Quodsi enim, in partu curando, Natura a solito tramite
de

deflexerit, aut cujusvis generis mala puerperio supervenerint, Naturae vel artis culpa in artificem, ut adspectabilem causam, saepius transferri solet: nec ita infelicem illum, quem solus incauti vulgi error persequatur, nec damnum augeant hominum malignitas, obtrectatio artesque pravae. Sin vero maledicae linguae tela avertere nequeat prudens consilium; si non tandem bona causa triumphet; si, nec temporis spatio, nec amicorum consolatione, vulnera obduci queant; medicamen adferet bonorum, quotquot sint, quos vitae ac fanitati restituit, gratus animus: cujus testimonia haudquaquam dubia vel ficta, perito arte viro munusque suum omni religione explenti, nunquam sunt defutura. Optimum denique laborum omnium solatium veraeque felicitatis praesidium praebet animus, nullius, nisi humanae tenuitatis, culpa sibi conscius. Hac conscientia exhilaratus, vitam, suis rebus contentus et erecto animo deget, nec unquam excidet spe remunerationis, quam bono et fideli ministro promisit ipsa veritas.

Disciplina obstetricia, in nonnullis Europae regionibus, jam dudum ex profesfo doceri solita, haud ita pridem in Academiis patriis pro dignitate excoli coepit. Non penitus quidem antea illius institutio defuit: etenim quis unquam eximie in hac schola docentis quondam CAMPERI fuerit immemor? Partum vero molientis Naturae observationi non dabatur locus: quapropter illa disciplinae docendae ratio, futuro medico quantumlibet utilis, arti faciendae haudquaquam suppetere potuit.

Anno demum superioris saeculi paenultimo, duce et auctore Cl. viro, mihique semper venerando Praeceptore DU PUI, Academia Leidensis gravidis hospitium, et studio artis consummandae occasionem aperuit; postquam, iisdem sub auspiciis, in pauperum tabernis, experientiae consequendae opportunitatem, minus facilem quidem, pro tempore tamen satis idoneam, sibi parassent artis obstetriciae studiosi.

In nostra quoque Academia Groningana, tantum absuit ut laudabilia Profesorum conamina et Magistratum provida cura successu caruerint, ut potius ad dif-

ficultates superandas stimuli essent ipsa harum magnitudo et frequentia.

Quantum mutatus a pristino, quem, XX abhinc annos, mihi conspicere contigit, praesens rerum academicarum status! Nihil abstulit aetas, nil detractavere calamitosae Reipublicae tempestates; multa vero meliora et ad temporis necessitatem magis accommodata esse, laetus agnosco. Chemiae cultum, pro disciplinae hujus et Universitatis dignitate, restitutum videmus; praecepta medicae, chirurgicae et obstetriciae praecepta, aegrotantium ad lectulos hodie tradi solita, medicos formant experientia non prorsus vacuos; qui, nostra memoria, mirabile dictu! in majore familiaritate versabantur cum homine mortuo quam morbofo, nec, nisi suo Marte vel medicorum favore, ad aegros visendi occasionem sibi comparare poterant.

Talem autem vitae humanae Divina Sapiencia voluit esse conditionem, ut bona addantur malis, ne illorum irruentium copia aut vehementia conquassati prosterneremur, rerumque adversarum cum secundis intima conjunctio ab effraenato gaudio nos temperaret ac retine-

neret. Quo quidem animi moderamine, qua fiducia erga summi Numinis benevolam providentiam freti, quamcunque sortem futuram submisce at fortiter ferre possumus, praesentisque temporis felicitate ac bonis grato animo frui, dum vel vulnerum dolores remittunt et rebus adversis minus agitamur.

Dolemus tamen, vehementer adhuc dolemus huic Universitati recens facta jactura; nemoque vestrum est, quin de istius praefagio anceps haereat, vel infaustum immo eventum pertimescat. Neque profecto is ego sum, cui tanta pericula occulere fas sit: etenim justissimae dubitationi tollendae mihi animus haudquaquam suppetit, qui ipse eo vehementius afflictum me sentio, quo reipublicae medicae illatae cladis magnitudinem aestimare possim forte melius. Nostrum enim, mortalium generi maturius ereptum MULDERUM, communi curriculo academico, studiorum et familiaritatis consuetudine devinctum tenebam; posteaque officiis semper conjuncti, artis medicae memorabilia saepius, et ad ultimum ferme utilissimae vitae terminum usque, inter nos communicabamus. At quatenam et quanta,

quae ipsi videre et tractare contigit, memorabilia! Quorum quidem enumeratio nullo usquam loco superflua magis censeretur, quam in hac, quae illius ingenio et fama floruit, Musarum sede. Cognovistis omnes, A. A.! virum variae eruditionis et indefessi laboris plenum; ardentem Naturae penetralium scrutatorem; egregii COOPMANSII dignum laudatorem; magni CAMPERI meritorum doctissimum praeconem; virum simplicem, ab ostentatione alienum, gloriolae contemptorem, propositi tenacem, veri justique amantem: cujus laudes amici praedicant, repetit optimus quisque, celebrat Academia, in astra tollunt quotquot ab interitu vindicavit familiae.

Tanti viri merita, quum verbis extenuare minime liceat, nec pro dignitate laudare mea dicendi permittat mediocritas, tacita tamen prorsus relinquere et temporis et loci vetabat opportunitas. Quis vero vestrum est, qui non moleste ferret, qui certe mihi ingrato ignosceret, si hac ipsa occasione silentio transirem, quem complures annos Profesforem habuit haec Academia, quem docentem audire mihi contigit, Cl.

MUNNIKS? Cujus castum, lepore et venustate affluentem sermonem nescio admiratus sim magis, quam ingenii aciem raramque in arte anatomica experientiam et elegantiam. Ut de omnibus, quae dixerit, quae demonstraverit carissimus Praeceptor, bene multa atque praecipua in animum reducere possum, sic mihi nunquam non ante oculos versatur ejus in administranda anatome decus et concinnitas: quorum neglectus, quum infuetos horrore perfundere soleat, justamque indignationem movere omnibus, qui in praestantissimo Naturae artificio summum Naturae Artificem venerantur, impedimentum, si quid aliud, infert salutari eorum consilio, qui, de maximo pathologicae cadaverum sectionis momento persuasi, omni ope enituntur, ne contrariae opiniones intenes animos radices agant altiores.

Tantae ingenii morumque suavitati an responderit discipulorum amor et veneratio, vosmet ipsi judicabitis, A. A.! quos non fugit, quantum hisce animi dotibus juvenilia pectora devinciri soleant. Vos quoque testor, quicumque de nostro commilitio praesentes adestis: Ecquis erat, qui amore non prosequeretur

eum, quem nostro communi commodo prorsus devotum videbamus? An unquam defuerimus illi, qui nobis semper adfuit, quem praeceptorem requirimus, amicum desideramus, patrem lugemus?

Hisce viris succesor creatus, quam grave mihi incumbat opus, ipse sentio: etenim tanti momenti mecum semper esse reputavi docendi munus, ut, illi explendo, vel doctissimi cujusque vires et vita vix pares crederem.

Desperandumne itaque mihi meae tenuitatis probe conscio? Haudquaquam A. A. ! ut enim, proximo superioris meae vitae spatio, me sustentavit meorum civium benevolentia, quaeque tanta fuit, ut nihil majus sperare vel et cogitatione comprehendere potuissem, sic laeta spes me tenet, vestrum omnium, quotquot favendo, administrando, docendo vel discendo, res Academiae facitis vestras, indulgentiam mihi non defuturam fore, qui quidquid in me est animi aut voluntatis, aut consilii, qui totum me huic Universitati, atque utinam ne malis avibus sit! adducere constitui:

Vos

Vos autem, perillustres Academiae Curatores, accipite mei omniumque bonorum grati animi testimonia! Vestrae nimirum vigilantiae atque amoris in Rempublicam debemus praestantissimos quarumvis doctrinarum et artium Profesores, Universitatis celebritatem, studiorumque adolescentium numerum tantopere auctum. Vestrae benevolentiae et constantiae accepta referimus splendida artique medicae discendae utilissima munera: quae si unquam peritura forent — — At vosmet ipsi, Nobilissimi Viri! prae aliis hujus rei pretium ac dignitatem semper perspexistis; vos pergitis omni favore prosequi universam rem Academicam; cui servandae et amplificandae ne vobis unquam auxilia deficiant, optamus omnes.

Quid vero relictas mihi Musas atque Gratias Harlempenses consolaretur, si non sit vestrum consortium, vestra consuetudo, Cl. Profesores! Nemine vestrum averfante, pluribus adjuvantibus, in hunc ordinem recepto mihi gratulor: cui vestrae existimationi me satisfacturum sperare quamvis vix ausim, in votis tamen et deliciis mihi semper fuit, tam felici potius augurio, quam

quam omnibus aliis opinionibus, rem aggredi. Atque si ulla sit societas, quae plurimum concordia valet et pia conspiratione, profecto propter has virtutes utilissimum sit necesse est Collegium Virorum, qui unice in inquirenda veritate versantur; qui, ad salutem publicam tantum spectantes, suo quisque tramite, ad commune bonum concurrunt. Haec vestigia ad veram felicitatem perducunt: haec sequi mihi propono. Amica manu me sustinete, Collegae conjunctissimi! ne spe labar, ne vestra vos fallat expectatio. Me vero non fallat mea vestrae benevolentiae fiducia: haudquaquam enim in hac Academia sum hospes: paternam domum intrasse mihi videor, quum inter Clarissimos, quibus fata pepercere, Viros, DRIESSENUM salutare mihi liceat, dilectissimum meique semper amantem Praeceptorem. Tuae meminisse non desinam in docenda chemia facilitatis; qui, sub profitendae Pharmaceutices et materiae medicae levi titulo, atque tenuissimo apparatu, artis salutiferae tirones flagranti chemiae amore poteras imbuere; illamque doctrinam, fuligine phlogistico adhucdum squalentem, ad technicos usus applican.

cando, de nostra Patria inprimis optime meritus es, posteaque scholae chemicae praefuisti, tam alumnorum numero quam studiis praeclarae. Tuae insuper excursions botanicae regni vegetabilis studium, cum dedecore medicinae, a medicinae studiosis quandoque neglectum, si non fustinuerint, boni tamen animi probatissimique consilii virtutem praedicant. Te denique grati animi benevolentia prosequuntur omnes, quotquot superstites sint, qui, te duce, tuos aegros visitando, praxi clinicae operam navarunt.

Te quoque saluum atque incolumem intuenti mihi gratulor, Cl. DE LA FAILLE, honoratissimum meum, post Celeb. BRUGMANSII obitum, in physicis Praeceptorem. Cujus quidem disciplinae studia cum ad ea pertineant, quae, ut uberius jam dixit CICE-RO, omni vitae studio et conditioni accommodata sunt, prae omnibus tamen medicum decent; quippe qui artem profitetur, quae, diligenti ἐμπειρία cautoque ratiocinio exstructa, praesidiis partim physicis et mechanicis, vires dirigit Naturae humanae, a viribus physicis minime alienas, ad conservandam vel resti-

tuendam integritatem corporis physici, universalium Naturae legum ordini omnino subjecti; cujusque functionum cognitio, sine naturalium rerum scientia, formida prorsus jacet atque inculta. Quum itaque primaria medicinae adjutrix sit physica, et, si necessitatem spectes, ad ejus ambitum pertineat, tibi Cl. Vir! honorem atque gratiam habeo non minorem quam Praeceptoribus, qui artem medicam me docuerunt, quibusque eadem religione ac jurejurando Hippocratico devinctum memet sentio.

Et tuus, doctissime THUESINK! nominari gaudeo discipulus: etenim quis medicus est, quem tua scripta non doctiorem reddiderint? Quis Batavae in medicina gloriae fautor, quin et illa plurimi aestimet? Quod tecum nunc artissimo studiorum vinculo conjunctus sim, pro honore habeo et suavitatis cumulo; nihilque mihi antiquius, nihil utrique nostrum jucundius, medicinae studiis commodius, aegrotantiumque saluti fructuosius erit, quam, mutuo amore, nostri muneris curas adlevare; quam conjunctis viribus cuncta conferre in medicinae practicae universae doctrinam,
ne

ne haec detrimenti quid in Academia nostra capiat. Sic tuas vires diu conservet et augeat, sic nostrum omnium spem sustineat propitium Numen!

Vos denique, carissimi Iuvenes, bonarum literarum et artium alumni! Vos imprimis, quos tenet artis salutiferae studium! lugetis acerbissimum funus: lugetis merito, nec unquam, spero, vobis excidet, qui rebus vestris totum se sacraverat, MULDERI vestri memoria: idque eo certius confido, cum, de vestro in studia aequae ac in studiorum duces animo, fama veri esse nuntia jam diu asfuevit. Quodsi me illius amoris participem feceritis, gaudebo, nec vestris desideriis unquam me defuturum spondeo vobisque recipio.

Quid vero vobis dicendum amplius mihi superest? Audivistis ea, quae ad artem obstetriciam feliciter faciendam maximo sunt usui: haec tantum non omnia necessaria quoque sunt chirurgo, neque a medico clinico aliena. Medicus autem, qui abstrusiores morborum fontes detegere, qui cujuscunque ordinis, ingenii, aetatis et sexus hominum curam gerere, illorumque animos infinitis modis ad ipsorum salutem fle-

flectere debet, medicus, inquam, vir sit literatus, neque artium, quae ad humanitatem pertinent, rudis atque imperitus. Quicunque ad hanc rationem sua studia instituit dirigitque, multis utilis, gratus omnibus sibi que satis esse poterit. Denique multum hic conferet ad conservandam doctrinae medicae stabilitatem et elegantiam, quae nostrae inprimis Patriae decus semper fuit atque ornamentum, praestantissimumque nostrorum Majorum sapientiae testimonium; quo ut nos, illorum profectibus aucti et usi, magis magisque digni evadamus, summa ope niti quemque decebit.

QUOD FELIX FAUSTUMQUE REDDAT DEUS O. M.

C O R R I G E N D A.

Pag. 7 lin. 10 argriculturam *lege*: agriculturam.

— 35 — 15 afflictantur — afflictentur.

FOR R I O N D A

Page 7 line 10 of original (page: original)
Page 8 line 10 of original (page: original)

